

Powšitkowne WOZJEWJENJA

njedźelu, 8. apryla 2018

Serb dóstanje diakonsku swjećiznu

Biskop Heinrich Timmerevers wudźěli sobotu, 21. apryla, w 10 hodź. na Božej mši w Drježdžanskej katedrali Pětrej Mrózej z Kulowa diakonsku swjećiznu. Wšitcy wěriwi su na tutu Božu mšu přeprošeni a měli so za njeho kaž tež powšitkownje wo duchowny dorost modlić.

Spominanje na Jurja Deleńka

Składnostnje 100. posmjertnin duchowneho a redaktora Katolskeho Posoła Jurja Deleńka budu so srjedu, 11. apryla, na njeho w Baćonju spominać. Započatk je w 19.30 hodź. z Božej mšu. Po tym přeprošujetej Towarstwo Cyrila a Metoda z.t. a Baćońska wosada wšitkich na faru.

„Lubosć k blišemu – policija – towaršnosť“

Na fachowy dzeń „Lubosć k blišemu – policija – towaršnosť“, kotryž wotměje so srjedu, 11. apryla, wot 9 do 16 hodź. w Budyskim Němsko-Serbskim ludowym dźiwadle, pře-prošuje Džělowe zjednoćenstwo cyrkej za demokratiju a čłowječe prawa. Zarjadowanje wotměje so w kooperaciji z mnohimi cyrkwinskimi a towaršnostnymi zarjadnišćemi, mjez druhim ze Smochčanskim Domom biskopa Bena a zwjazkom Carity. Dalše informacije, tež nastupajo přizjewjenje, su pod www.kirche-fuer-demokratie.de wozjewjene.

Požohnowanje motorskich

Popołdno z požohnowanjom motorskich zahaji so njedźelu, 22. apryla, w 14 hodź. z nyšporom w Ralbičanskej cyrkwi. Přizamknje so zhromadny wulět.

Beneficny koncert

Za wjacore socialne projekty w bołharskim měsće Razgradže přewjedže Towarstwo swjateje Filomeny z.t. njedźelu, 29. apryla, we Łazku beneficny koncert. Mjez druhim wustupi Carolina Eyckec ze swojim tereminom. Koncert wuhotuja sobu Chróšćancy muzikanća, chór Delany a Smjerdžečanska rejwanska skupina.

Na měrowy swjedzeń do Wostrowca!

Přećiwo prawicarskemu zetkanju we Wostrowcu k Hitlerowym narodninam napominaja nimo cyrkwe mnohe zwjazki, zo bychu so wot pjatka do njedźele, 20. do 22. apryla, w městačku nad Nysu na měrowym swjedženju wobdźělili. Towarstwo Cyrila a Metoda z.t. (TCM) je na swojej hłownej zhromadźiznje 19. měrca, w Ralbicach na nastork dekana Wita Šćapana wobzamknyło, zo tutón měrowy swjedzeń podpěruje. „Njech so mnozy wobdźěla. Z mnohimi druhimi zwuraznymi z tym, zo smy přećiwo rasizmej a ekstremizmej a zo zasadžamy so jako křesćenjo za tolerantnosť a za měř, we Wostrowcu runje tež na hranicy k Pólskej, kotraž je pod němskim nacionalsocializmom bojaznje čerpjeć dyrbjała“, praji předsyda TCM Jurij Špitank. Wón je po dorěčenju ze zarjadowarjami we Wostrowcu za sobotu, 21. apryla, bus skazał. Tón wotjědže w 10.10 hodź. z Radworja a pojedže na Ralbicy (10.30 hodź.), Chróšćicy (10.40 hodź.) a Budyšin (11.00 hodź.) do Wostrowca. Wottam pojedže wón wokoło 17.30 hodź. wróco. Zajimcy měli so w redakciji Katolskeho Posoła přizjewić, telefonowe čisło (0 35 91) 550 212. Mjez druhim su w klóštrje Marijinym dole dny wotewrjenych duri.